

Christian Meivah



September - October, 2019

Lhani seh thuso

Private Circulation

Jesu hi koi hia ham ?

John Baptist in Jesu hi Jordan vadunga Baptise achan sah jouvin, Lhagao Thengin gamthip a Jesu ana puimang tan ahi. Mol noi a Jordan vadung longa ahin, hiche mol a hin leiko tampi aumin, leiko hoa hin nisa sat jeh in mi akicholdo jin, chule phalbi laile adap behseh tengle hiche leiko hoa janin mi alum jie. Jesun ni 40 an ngolna mun din hiche leiko ho lah a khat ana kilhene. Thip beh a ni 40 leikoa an ngol hi thilbai vang ahipoi.

Ni 40 leh jan 40 an ngola aum jouvin, agil akel tan, satanin ahejet jengin, avel donga songtum atamin chule nijong ahasat lleh in, satan chun ahenga, "Pathen chapa nahile hiche song ho hi changlhah asona dingin seipeh in" ati (Mt. 4:3). Jesun ahenga, "Mihem hi changlhah keova hing thei lou ding, Pathen kamsoh thu hoa bou hing dia kisei ahi" anati. Satan chun mihem hi bei tah a lhep jou ahinai, ti ahen, khopi thenga apui in asang lai-a adinsah in, anivei nan Jesu henga, "Pathen chapa nahileh kileh lha jengin, Pathenin avantil te thu pen tin, akhut uvin na dom navvinte, tin Pathen

lekha bua akisun nai" ati. Hijong chu Jesun alah peh tapoi. Chuin athum veinan satan in Jesu chu molsang tah chungga apui touvin, vannot leiset lenggam jouse leh aloupina ho avet sah in, "Kahenga naboh khup a chibai neiboh le hicheng pihi peng kate" ati kittai. Chuin Jesun aheng a, "Chedoh in Satan, Pakai na Pa then chu chibai naboh a, ama jeng bou nahou ding ahi, tin Pathen lekhabua akisun bouve" atipeh tai (Mt.4:10). Thumvei Jesu alheplel phat chun, satan chu achemang tai. Chuin vantilte ahung un, Jesu ahung jenle tauve. Satan in vannot leiset pumpi chungga thanei le thuneina peh ding chan gei-a Jesu chu alhep ahin, ajou deh tapoi. Hiche lai chu Mose Danthu chelai ahin, Jesun Mose dan thu lekhabua kisun doh hoa kona satan chu anadonbut ahi.

1) "Pathen lekhabua kisun chu, mi hem hi changlhah keova hing theilou ding, Pathen kamsoh thu hoa bou hing dia kisei ahi" (Mt.4:4, Deut. 8:3).

2) "Pakai na Pathen, patep a nalhep chatvai louhel ding ahi, tin akisune" (Mt.4:7, Deut.6:16).

3) "Chedoh in satan, Pakai na Pa then chu chibai naboh a, ama jeng bou nahou ding ahi, tin Pathen lekha

bua akisun bouve" (Mt. 4:10, Deut. 6:13). Ni 40 leh jan 40 Jesun thip beh-a an ngola Pathen agahou jou vin, anatoh patna din, hinkho thilgon ahin neitan, phaicham lama ahung tai. Hiche lai hin, Jesu koi ham ti hi mi ahelou ana tam behseh nalai-e. Anu Mary in koimong ahi ahenan, ahin hichu ana phongdoh pon ahi. A-inheng te ho leh avela akihetpi hon ama hi Nazareth khoa thing thembol khat danin ana heuvin ahi.

Baptist John chu songkul a akikhum phat chun, Jesu Galilee a ahung in, Galilee Dillen chung lama um Capernaum kiti town a chun acheng tan ahi. Capernaum a kona hi Christian hou hung kipan doh ahi. Hia hin Peter in aumin, hia chun Jesu nung jui ho akikhom jiuve. Nazareth chu Galilee mola atum beh a um kho khat ahin, Capernaum hi Dillen panga munpi khat ahin, miho chele vale jingna munkhat ahi. Damascus a kipat Egypt chena lamlen pang tah a um ahi. John Baptist nungjui ho chun jui ding anei lou pettah a Jesu chu John tohban jom dia hung anahi.

Hikoma Synagogue a Judah mi ho Saturday ni seh a ana kikhop ji lai chun, Jesun jong phatpha chu amang chan thu ana sei jin, mihon ana ngai nom lheh jiuve. Jesun mi adamlou ho asuhdam, kineo sah tah a aum, chule thilha vop ho abol dam ho chu mihon amuvin kidang ana sauve. Capernaum a aminche dan mihon ahe cheh cheh tauvin, chule

2

Jerusalem leh mun gamlaa cheng Syria gei a konin, damtheina ngaicha ho Jesu henga ahung tauvin ahi. Jesun ngaman mi li Peter, Jacob, Andrew, John ho amun, nei jui un, mi manin pansah unge, tin ana kou vin, amahon ajui jeng tauve (Mk. 1:16-20). Akou hon ajui jengu hin avetsah chu ahile, amaho mi nga hi Jesu toh anakihesa ahi, ti hi akiman doh thei-e. Samaria numei nu henga, kei hi Messiah chu kahi, tin aphonng doh in ahi (John 4:25-26).

Numei ni chule danthu ni

Gal.4:21-5:1 sunga hin Abraham chapa teni thu aumin, khat chu sohnu Hagar a kona peng ahin, chule khat chu jalen nu Sarah a kona peng ahi. Galatia mite henga Paul lekha sut a hin, Galatia mite hi Jew ahin, amaho hi danthu noi-a hinkit ding goho ahi. Jew ho hi Abraham son ho ahiuvin, Pathen kitepna ho leh phatthei bohna ho amaho ding ahi, tia kiletsah piho ahiuve. Ahinla Paul in amaho henga Abraham in chapa ni anei in, khat chu kitepna dung jui-a peng chapa ahin, chule khatpa vang chu sohnu a kona peng ahi, tin asei-e. Khat chu phatthei bohna achangin ahinla khat chu achang poi, tin asei-e.

Tahsaphe lam pen dola peng vang chu Abraham chapa ahi vanga phatthei bohna chang lou ahi. Hiche hilchetna a hin Hagar hin Sinai Mol leh danthu thusom ho chu

avetsah in, chule Ishmael chun Jew nam mite chule leiset a Jerusalem amaho munpi chule a Pathen hou nau mun chu avetsah ahi. Sarah in Calvary a kona hung kisp doh Kitepna Thah chu avetsah in ahi. Chule Isaac hin Christa tahsan jeh a Kitepna Thah a um mihem ho jouse ahetsah ahi.

Ishmael chu leiset mihem dang pena peng ahi. Abraham in Pathen kitepna suh bulhingna dia Pathen kithopia pang dana kigela, Pathen thil kidang bol theina don louva ahin, achapa chu ahi. Israel nampi hi tahsaphe lama peng chapa a kon ahin, Kitepna Lui khanga dia peng ahi. Ahinla Isaac vang chu vangbohna noi-a, chunga kona peng ahin, anu Sarah chu Abraham jinu ahi. Ama hi mihem pen dola peng ahi vangin, Pathenin agon ahi. Pathen kitepna suh bulhingna jala peng ahina chunga, tahsanna in ahin molso ahi. Isaac son le pah ho chu adeh in lhagao mi ahung hipeh uve.

Rome lekhabu akisima ahile Paul in tahsa lam Israel leh Lhagao lam Israel atekah jinge. Isaac hin Lhagao lam Israel avetsah in, mihem lungdei a peng hilouva Pathen lungdei a peng ahiuve (John 1:13). Nicodemus chu Jesu henga ahung in, Jesun ahenga Penkit thudol ana sei in, twi leh lhagaova penkit ding thu ana seipeh in, ahi (John 3:3-5). Jesun ahil Penkitna thudol hi Kitepna Lui-a aumpoi.

Hagar leh Ishmael chu ani lhonin soh ahi. Amani hin Sinai Mol a kipe Danthu som chu ahetsah ahi. Hiche Kitepna hi mihem ngonga thingpeh (yoke) kikanbeh tobanga gihsa ahi. Hiche khupeh chu apa teuvin ana pojou pouve. Kitepna Lui a akium laisea chu mihem hi chonset soh chule vannoi leiset soh kihia ahi. Sarah le Isaac chu chamlhat tah a hing ahi lhone. Jerusalem a Christa Kitepna sem chun tunia eiho jouse eichamlhatsah-u ahitai. "Jalenna inei theina diuva Christan eilhat doh-u ahitai. Hijeh chun ding det jingun, soh namkol jona chun kihen oh kitta hih un" tin akisune (Gal.5:1).

Jesu Christa jala tunia eiho hi Mose Danthu in eikan theilou-u ahitai. Hepina dimset Pathen toh hingkhom ihi tauve. Tahsan vanga lungsetna kichanga, chonset ngai damna changa sohcha ihi tauve. Dan thu noi-a akihin lai-a chu chonset ngaidamna him him kichang joulou anahi. Kitepna Lui tichu Danthu Lui dung jui-a chonset ngaidamna umlou anahi. Jesu tahsan jouse chu chonset ngaidamna jalen na chang ahi tauve. Hiche jalenna hi chonset kibol ji nalai jongle jalenna chu ahipoi.

Sinai mola Mose kipe chu Kitepna Lui ahi, ahinla Christa jal a Kitepna Thah hi Calvary Cross a kon ahi. Alui chu Athah in akhel ahitan, alui akilemat kit leh hepina kichang lou ding ahi (Grace). Ani nia jong kimang theilou ahi (Gal.5:4).

Pathen suhmila satan hou

Satan in mimasa teni Adam le Eve ana lhepllah a kona, amani chonset gui-a peng jouse chonse a ihitauve. Gen.6:1-8, 19:4-11, Rom. 1:18-32. Chonse a ikisim tah jeh uva chu, chonset lungthim dim set a, chonset lungthim hung ki phong doh chu, (i) lung sunga Pathen ginna kinei-a konin, Pathen thilsem kidang ho joh Pathen khela kihoulo, (ii) tahsa adih a manchah dia Pathenin eisempeh ho jonna leh akileh lama kimangdoh, (iii) jou lungthim le kiletsahna dimset a jon thaanhoi-a hinkho kimang dohji ahitai.

1. *Pathen vangboh na ho* : chu Pathen khela kihou ahi jie. Mihem hinthei na dia Pathenin asempeh jouse, asemah Pathen joh kidon ta louva, athilsem ho joh kihouji ahi. Pathen vangboh a hamphatna kimu jouse jong chu, vangbohpa Pathen kisumila amanchah ho joh kipahcha ji ahi. Mi abangin tahsaphe lungna chimna ding gela, alamdola Pathen gon banga thengsela nupa a um ding sangin jon bolna in akimang doh jie.

2. *Satan lhepllah* : ahinau hi mihon ahinkhon avet doh sah jie. Chonset kimudohna chu ahile Pathenin asem banga kimang louva akaleh a hinkho kimang chu ahi. Pathen jang gop-a aum gei-a, theng sela numei le pasal kidei, kingai um beh seh talou, chule numei le numei nupa uma um, chukit le pasal leh

pasal leh pasal nupa uma um, chule Pathen thil gona numei khat le pasal khat kigoma tikhat a um sanga, ato phah chan toh jong chonse ho hi satan lhepllah ho ahi. Jamo leh huh lama kijonbol chule pasal hat jon numei thabei chu kichepna tobanga nei jenga chule abang athalo ji ho hi Pathen ginlouna ahi.

3. *Mihem jouse sopi* : banga bol sanga kidatna dimset hinkho jong aum tai. Thahat pan thadoipa ki chep naa nei-a, noise tah-a, alhasam miho bolse se jeng aumtan, Democracy mina chonsetna chule mitam thua chonnan milhom asuh genthei a, kivahna nei-a jong aum tai.

Mihao in vaicha genthei te tahlel te anop nop a bol, athaman kipe lhing lou, agen theina chung chona bolset be, khantou sah sanga suhmang ding gong jo, atamda ta poi. Aching jon alhasam ho duhaa bola, kivahna nei, soh-a vul, ganhing vula vul, thilse aman abol banga bol ho pachatna pe, phajo sahna nei aum tai.

Chonset a peng ahi jeh a hi, chonset kiphon dohna jouse jeh-a hi, vannoi mihemte lah-a, gal le tol soh jing ahitai. Lung monga khosa thei louva, mihem ten hinkho manga ahitai. Koima hi imachom aum pon, chonse akihi soh kei jeh-a hi bolmo jong um behseh talou ahi. Apatna diu chu, apenna gui, chonset hi suh bei-a, Pathen kom bel hi ahi.

Thokitna thudol

“Hiche Jesu hi Pathenin akai thou tai, keiho chengse hi het tohsah kahiuev” tin Pentecost nin Peter in mipi henga ana sei-e (Acts 2:32). Pakai Jesun athia athokit ding thu hi thum vei ana seikhai (Mt. 16, 17, 20). Hitia vel thum tah ana sei vangin, Jesu cross a akikhet beh a, lhana akivui phat chun, asei juite chu Galilee gam lama ajam gam tauve. Jesu thusei chu atahsan louvu hiding ham ahiloule asuhmilu hitam vang hiding ahi. Peter jong chun lung hel tah in, tila nga anamat ji chu bol kit ding atin, aloiho toh Galilee Dil a len asep kit tauvin ahi (John 21:3).

Jesu Sunday nia athodoh chu Mary tehon agahe doh tauvin, Jesu athou kit tai tia seijui ho henga ahung sei-u chun, Peter akipat doh in lhan lama alhai lut jelin ahile, tupat pon nem bou agamun, Jesu la ana mu pon ahi (John 20:9). A Pakai pa agamu lou jeh-a, lunglha hitam atahsan lou jeh ham la akihe pon, kalen kise kit tange atitai. Hijeh a chu Jesun angailut jeh a alen senau va ahin holdoh-u ahi.

Tun vang athodoh hi kichen tah in Peter in amutan, akipah in alungmong tai. Chule Thomas in jong amuchen mong mong phat in atahsan tan ahi. Jesu athou kit tai tia asei phong jeh un, thempu pipui ho leh Pharisee hon ajada tauvin, Paul teho gei-in, mi abang songkula

akhumun, abang atah un, Stephan jeng jong chu songin asep lih un ahi. Thempu hon lhan ngah ho hengah imchah kheh un tia thu apeh vangun, immang thei mong mong ahitapoi.

Ni 50 jouvin, Pentecost nikho ahung hitan, mi jouse mit mu chang tah-a, Lhagao Theng ahung kibung lha tan, hiche nikho chun imjou hoi hita louvin, Peter in hang san tah in, thu alhangsap tai. Peter in, vo kamite Judah te nang hon Jesu nathauva lhana navui pau chu, Pathenin akai thou kit tai, aheto-ha keiho kabon chau kahiuev, ati chun, mipi chu alung dong gam tauvin, akisih un, chule mi 3000 in alung ahei un, Jesu ana kisan un, Baptise ana chang tauve.

Khonung in mi 5000 in ahin belap tauve. Tulai eiho dia Jesu thi naa kona kaithouva aum banga, ei ho jong thiden louva kaithou ihi diu eivetsah-u ahitai. Jesu thokit jeh a eiho jong kaithouva um ding ihi tauve. Tunin, thi hi mi jouse kichat le gin um tah ahi. Peldoh thei hilou thina chu, Pakai Jesun thina gal eijopeh uva, thikit louna hinkho atahsante eipeh-u ahitai (1 Cor. 15: 55). Pengkit (pengthah) lou ho din thi hi gin umtah leh kichat um tah ahi. Pengkit saho (Pengthah ho) din vang lhan hi, lupna jalkhun tobang bou ahi. Lupkal ngalel um tah ahitai. Ithi masat loule van gam kimu lou ding, ithile bou van gama kiche ding ahi. Ahinga van kal ding aki umpoi.

Lhan chu hopa tei ding ahi. Jan le jalkhuna ilup uva, jingkah teng ikitho kit banguva, lhana chomkhat ilup pa diu, Pakai nikho nileh itho kit diu, ahi. Tulai houbung loi khat in mithi alhah tengu leh, lei chu lei soh kit ding, vut nahin vut naso kit ding ahi kiti hi amangcha jiuvin, hichu adih poi, mantah lou ding ahi. Old Testament thului thu thisa ahi tai, Jesu Christa vanga tahsa puma thokitna uma ahitai. Jesu athokit a chun, aphe agu themcha jong adalha poi. Hiche banga chu eihon jong tahsa hi ida lhah lou diu ahitai.

Hijeh a chu Paul in, ama thi lim banga ithiu le ama thokit lim banga ithokit diu ahi ati ahi. Nang in thokitna hinkho hi nanei hitam ! Ole namoh ginchat a namoh kinep tho bep ham ? Jesu hi koi dinga thia thoukit ham, ti phaten kingaiton ! Van gam ilhun tengu le iti kipa tha nop aumta dem. Jesu imu tengu leh galjo la sa-a i-ao le diu atiuve. Asim jouse thokit hinkho Pathen in peta hen, Amen. - (L) Rev. Seikholen Lenthang

Amangsa holdoh ding

Lhagao mangsa huhdoh dia kisalel hon aheth diu chu, ama hon achanga ima abol thei diu aumpoi, tihi ahi. Anatoh naa Pathen apansah louleh satan hung chomlut a satan na joh atoh ding, miho mitmua Pathen natoh-a kilang ding ahi. Hijeh hin, Pathen manchah mi tampi, apullha jie. Satan in ama chu sum ngailu ahisah in, amit a ahoi apha

6 amusah jin, akola din min angai nom nom ding ho asei sah in, chutengle Pathenin ama bol theina, thil kidang bol theina apeh ho chu akile lah in, anungsun jitai.

Jesun ajah lhonah, “Neijui lhonin, mi manin pansah lhon inge” ati (Mk. 1:17). Hijeh chun, amang kon huhdoh ding hilouvin, amangsa huhdoh ding joh a Jesun seijui ho ana kou ahi. Eiho jong lekha them Bible school a kai, bol theina sei theina nei kihilou maithei ahin, Jesu toh akipan khom pouva ahile aman mihem ho lungsunga na atoh a ijo lou ding kijouva, ingapchat lou jong aman aseije abolje eihilji ahi. Tulai hin thu tamsei jong apha chompoi. Giltah a themkhat khat seidoh ji joh angai-e.

Koima thet neilou ding, mi hon ihenga alungkot ahon theina diuva jalhai tah-a, jou pang louva, mai lhan lheile nui heova kihoulim pi ding ahi. Iki houlim pet-a, ilunga Pathen koma panpina kithum ji ding ahi. Mi chu mi kamtam ahile asei ho chu ngai peh peh jenga, kava vah a bou alung chu Pathen lam agel doh theina dia pui ji ding ahi. Naki houpi mi chu Pathen houlou, Jesu helou ahi jeh a, jabola kihoulimpi ji ding ahi. Bible chang tamtah sei khum jong ngailou ahi. Nasei chu kahenai, ti lungthim puma, asei ho khetlhah jilou ding ahi. Lunglut tah a athusei ngai dana um ding ahi. Ki neo sah a, kinelpi lou ding ahi. Na kinelpia nahile athun ama chu jou jongle chun, amihina chu ima louva

koi nahisah a, nakihou limpi dalo ding ahi. Philip in, Messiah chu kamu tai, tia aseï chun, Nathaniel in “Nazareth khoa thilpha soh ding ong” anati chun, philip in, “Hung in hung ven” atin ahi. Akinel pi poi (John 1:46). Bible lentah kichoï sang a aneo kichoï apha joi. Amahon Bible len amuleh akicha ji tauve. Na kihou limpi jouse jotho ding go hih beh in, Pathenin napui na dingin taona joh mang in. Kisem hoïsel ding, kivon thengsel ding ahi.

Suma choh theilou thil

Peter in ajah a, “Nasum le nangma manthan, Pathen thilpeh suma choh jou dolin nagelin ahi” ati (Acts 8:20). Solchah lekhabua Philip hi ‘Evangelist Philip’ ahin Jesu solchah Philip chu achom ahi (Acts 8:4-25). Hiche Philip hi Deacon khat ahin, amahi Greek pao tho mei thai ho vetup a ana kinganse ahi. Philip hi Greek pao tho Jew khat ahi. Philip hi Samaria a anacheng in hia chun Pathen thu ana seiphong in ahile, mihon angainom un, chule bol theina mi damsahna leh thil kidang ho bol theina jong aman chah din ana changin ahi.

Simon (Simon Magus) tia kihe pasal khat hin Philip thusei ho chu ana tahsanin, aman jong Jesu atahsanin chule Baptise ana chang tai. Simon hin mitphel doi (Magic) ana manchah a mi tamtah akitahsan sah anahi. Philip thuphon jeh a Samaria a mi tampin Jesu ahin kisan

phat chun, Peter le John jong ama kithopi din Samaria ahung tai. Ama nin miho ataopeh a ahile miho chu Lhagao Theng ana chang tauvin ahi. Simon hin Peter le John a kona Lhagao Theng thilpeh chu ama jong ahom doh thei a apanna din, Peter le John chu sum apen anahi (Acts 8:18). Peter in suma Pathen thilbol theina kichoh agot jeh chun, solchah Peter in nasum toh manthan tin ha phon ana phoh in ahileh Simon chu akicha tai (Acts 8:20-23). Baptise achan vanga leiset hinkhon achup nahlai anahi. Ama banga eiho lah a jong Lhagao thuleh Tahsa thu helpol go jing mi atame.

Pathen lenggam hi suma choh hoi ahipoi. Khangdong mi haopa chun, thilpha bola Tonsot Hinna lam doh ana goi (Luke 18:18). Ama jong hi leiset hinkho dalha louva sohcha nom khat ahi. Ama hin thilpha bola Lhatdam chan ding ana got ahi. Lhagao thil khat muna dia suma choh ding tiho leh natoh pha a kona lamdoh ding tihi Pathen thu toh kitoh lou ahi.

Suma Pathen lenggam ki cho theilou ahiloule suma Jesu kicho thei lou ahidan hi het ngai ahi. Hijeh a hi, Jesun khangdong mihao pa henga, nagou jouse joh in chule asum chu migenthei mivaicha ho hoppeh in, atia amapa ngaito lou beh khat ana seipeh ahi. Kipana hi suma kichoh theilou ahi (Acts 8:8). Samaria mite henga Philip in kipana thupha aseiphong jouvin, mihon thu

Solomon chihna thudol

Solomon kiti min hi Hebrew pao ahin, chamna tina ahi. Israel gam akihop khen masanga leng athumna leh achaina Solomon ahi. Apen lhah chun amahi Pakai lungset chapang ahin, ama min hi jong Jedidiah ana kiti (2 Sam. 12:24-25). Leng David leh Bathsheba chapa anina ahi. Bathsheba hi sepai lamkai Hittite mi Uriah jinu chu ahi. Solomon leng ahung hi chun, apa David bangin, Pathen ana lungset in chule ana tahsanin ahi. Leng ahung hi jou chule Moriah (Jerusalem) a hou-in masapen ana tundoh masang chun, Jerusalem sah lama um, Km. som a um Gibeon a chun Pathen lunggel ahet theina din ana chen ahi.

Hiche pet a hi Pakai Thing kong (Ark of the Covenant) chu Jerusalem ahi. Pakai in leh sum eng maicham chu Gibeon a ana um ahi (bronze altar and tabernacle). Hiche maichama hin Solomon in pumgo thilto anabol in, Pakai chu ana houvin ahi. Hiche maicham toh kinai a Solomon, hiche nilhah a ana lup leh, amangin akoma Pathen ana kilah in, “Ipi peleng nadei em?” tin ahin donge (1 Kgs. 3:5). Chuin Solomon in chihna ana thume. Lung thengsela athum chu Pathenin ahen haona leh jabolna jong ana pen ahi. Nupi ni nao chapang khat akichu lhon tan, hia chun Pathenin apeh chihna chu ana mangchan dihtah in thu anatan in, mihon kidang asauve

pha chu ajauvin, atahsan un, kipana in adim lhauvin ahi (Gal. 5:22). Kipana hi Lhagao ga khat ahi. Pentah (Penkit) a kona sohji ahi. Samaria miho chun Lhagao Hinkhoa kikhel na anei-u chu akipapiu ahi. Kipana dia sum kipe thu jong Bible a aum poi. Jesu toh akihoulim jouva konin Zaccheus in lungheina ana nei-e. Hiche masanga chu leiset sum le pai a hinnopna, pachanna ana nei ahi. Bible in mihao ahi ati. Ahinla Jesu toh akimuto jouvin kipana dim ana nei-e (Lk. 19:6). Aman kipana anei chu sum le pai jeh ahipon, Jesu anei a apen thah tah jeh anahi. Sumin kipa na achojou poi.

Sumin Lhagao Theng acho jou poi. Peter in Simon henga, na sum le nangma damuna chelon, tin ana phoh in ahi (Acts 8:17-20). Pa Pathen leh Jesun, vana konin Lhagao Theng atahsan mi 120 henga ana bunglhai (Acts 2). Hiche Lhagao Theng chu amahon suma achoh doh-u ana hideh poi. Ajeh chu Lhagao Theng hi thilpeh (Gift) ahi (Lk. 11:13). Pentecost jouva Lhagao Theng kipehna chu Samaria mite chu anahi (Acts 8). Lung sunga kipana le chamna jong hi suma ki chothei ahipoi. Pathena kona muthei ahi. Eiho lah a lenggam ni aumin ahi. Khat chu neile gou lam lenggam ahin, chule khat chu Lhagao Hinkho lam lenggam ahi. Alhou dingpa hi Lhagaova pa hi ahi. Lhagaova pa hi Jesua kona kimu ahi. Hiche hi tah sa lam dol lenggam sanga hatjo ahi.

(1 Kgs. 3:16-20). Ahaona leh achih na vannoi a akithan chun, Sheba gama lengnu jong chun achihna het chilna din ahung vilin ahi (1 Kgs. 10: 1-13). Sheba kiti gam hi tua hoikom mong ham ti akihe pon, ahinla tah san dolin tulai Yemen khu hidin gin chat ahi. Solomon le lengnu hin ipi pi thu aseilhon ham, ti akihe pon ahinla Sheba lengnu hin achihna le avaipoh thepna chule ahaona ho chu kidang anasai tivang akihei.

Bible sunga “Thuchih Bu” (Proverbs) hi abona Solomonin anajih doh hilou mai thei ahin, hia hin chihna thu tampi ana sune (Prov. 1:7). Hiche Prov. 1:7 a amasa lama hin, Pathen gin hi chihna bulpi ahi, akitin Bible chang kichaina lama hin, mingol in hiche chihna adou dale, ati (Ps. 53:1). Solomon hinkho kichaina lama chun, aman gamchom nam dang numei Pathen helou ho jong ahin kichenpi tan, amaho chu alung lhai sahtan, Pathen angailut sangin hiche numei ho joh chu ahin ngailu tan ahi leh, achunga Pathen ana lung hang in, ama khang akichai chun aleng gam chu mihon achapa apoh sah nom tapon, agam chu hopni in akikhen lo tan ahi.

Pathen alunghan tengleh koi man athoh joulou ahi. Chubanga mi ching Solomon sang chun Jesu hi aching joi ti iheuve. Hetna chihna ingaichat tengule Jesu henga ithumu leh aman eihin kithopi jiuvin ahi (Col. 2:3). Jesu nei chihna bulpi ahi.

Nadam dom nomleh

Tulai a idam monau atamjo hi ichih thei lou jeh-u ahi jie. Eihon icha teu bu inehsah tengule, alham lhamin vallut in lang hin, itih a gal le tol ahung ding kihelou, tin lungkin tah a bu nechai din ihil jiuve. Japante vang in, achateuvin bu aneh tengule ola ola alhai uva, bugum seh hilouva atui anang jong anetha ji diu chule pung makhai (adha ghonta) beh asuhmang na diuvin ahil jiuve. Hijeh hin acha teu lungthim chihna lama akhang touvin, lekha them atam un, atoh atham hou lunglut tah in atong un, akhang tou uve.

Two don hi jong damna tah ahi. Mihem thisana twi hi atamin ahi. Nilhah imut konle khon khat dontei a, jingkal ikitho tengle khon ni donji hi dam theina ahi. Nikhat a twi liter 5 beh don ho chu adeh in Gastric le Kal-nat deldohna lampi khat ahi. Idang achah loule donlou ding tihi tulai in adih tapoi. Chate jong aphant phat a donsah tei angai-e. Upa teh lam mano hon jan junthah seh-a twi kam khat beh donjia lupkit aphant.

Alhum kiti hi kum 40 lhing sa hon angol diu, ahiloule alhom neh diu aphant. Mitinin chi (salt) tamneh lou ding ahi. Chi haneh ho Blood Pressure avei jiuve. Niseh a athuh hi themkhat khat nehji ding, hichu buneh jou hilouva oikeyo pet ahile aphant. Neh jouva athuh akineh le oi a nehminna tha alhomsah jie.

Nui-hi damna (Prov. 17:22)

* Nikhat Paolal office alhun lhunin a Boss pan, “Paolal, thi jouvin hin kho aum nalai-e, ti natahsan em?” atile aman, “Pu, katahsan poi” ana ti. Boss pan, “Ken vang katahsan mamai, ajeh chu janhin nanging na loipa Lalboi athitai, tin suti nanalan, ahinla janhi sunin office a nangma holin Lalboi chu ahunge” anati.

* Nikhat Pastor pan hou-ina thu aseinaa, “Peter chu theiba phunga ana kai in Jesu ana ngah-e” atibep leh houbung chairman pan, “Theiba a kaldoh chu Peter ahipoi, Zacchaeus joh ahi” ahinti loichale. Chuin Pastor pa chun, “Hijou chun, Jesu ahungin Peter henga, Peter kintah in hung kum lhan, theiba chung a kaldoh ding nangma chu nahipoi, Zacchaeus joh ahi, ahinti. Tunia hia hung jousen ihet diu chu, ijem tia ikal louna ding thinga ikal khah uvem, phaten kikhoh leu hen aphant” tin anasei-e.

* Sardar in Doctor pa henga, “Ipi dia jan kamang seh a jucha ho football kichem jia ham, aphantna ding lou neipen” atileh Doctor pa chun, “Hichu navet jing nomlou haimo?” atile aman “Mang adang dang jong kimat din kadei-e” anati. Doctor pa chun, “Achutileh, tuni nilhah-a kon in, na-imut konle hiche louchang hi khat khat ana nele chun phatante” ati. Amapa chun, “Doctor pu, jing nilhah-a pat netange. Ajeh chu tunilhah a Final kichem diu ahi” anati.

* Circus kichepna khat a, nungah khat hi humpi khat toh akichop to in ahi. Ring Master pan, “Ave ho lah a amani kichop tho-nom naum ule hin sei un” ahinti leh pasal khat ahung ding doh in, “Ken jong amani bol chu kabol nome, hijeh chun amasan humpi chu hikoma kon chun puidoh un lang hileu chun, ken jong kichopto chu bol jeng inge” anati.

* Nikhat Pastor pan a sermon a, “Kahinkhoa nom kasah pen chu ahile, midang khat jinu toh lungmong sela katou khoma, kakihou limlhon pet chu ahi” atile mipi chu athip chet jeng tauve. Chuin Pastor pa chun, “Hiche numeinu chu koima dang ahi poi, kanu ahi” ahinti leh mipi chu hanui in ana nui lhauvin ahi.

Ana kijah doh pasal khat in a-ina ajinun bu ahon pet in akoma atouvin, “Kahin khoa nom kasah nikho chu ahileh, mi dang khat jinu toh lung mong sela katou khoma ka kihoulim chu ahi” atibep leh alujang ahung pohsot in, ahung khah chun, hospital a ana lumin ahi.

* Ojapin Sunday School chapang ho henga, “Ahtui a kona ahpi iti hung umdoh thei ham” tin ana dongin ahi leh chapang khat in, “Ojapi, nang thudoh chu ahahpon, ahah jo chu ahi leh ahpi chu iti ahtui sunga lut a uma ham, tihi ahijoi” anati.

* Ojapun, “Vannoi a saho lah a ana kitem masapen ipi ham” atileh chapang khat in, “Black & White kiti hi amasa loi ahin, Zebra ahi” anati.

Het-a phachom ho

* India a sum ahah tah jeh in, thil man ho jong akal lheh tan, migucha, mi joulhep jong atamtai. Chule nu-me chapang kimat ho jong atame. Chihthei angai lheh tai. Mi moh tah san san lou ding, kigin jing ding ahi. Koi tobang in, Electric Dept. a kon kahi, check free a kabol diu ahi, tin mili cheng ahung un, ahiloule Water Supply Dept. ahiloule Gas stove ho free a sutheng ding kahiueve, atiuvin, kot akihona akilut sah tengle pistol, chemcha mi avetsah un, mi achom jiuve. Mel het lou lut jong lutsah lou ding, kihoupi sot lou din apha.

* Minu khat in achate buhse vei phatna ding buhse lou (cough syrup) donsah agot leh adonnom pouvin, chuphat in bongnoi leh lou chu achoh halin, bongnoi dona adon sah ule adon tauvin, ahinla athilo soh hel tauve. Bongnoi le buhse lou kitoh lou, thina gu, soh ahitoh-e. Kichih thei un. Bongnoi hi loudang to jong hel louvin apha, seithe ahipoi.

* An honpet a, Gas stove mei aki lha pet a akoma Mobile a mi toh ki hou lou ding, min eihin kou jongle Gas koma kihou louhel ding ahi. Apoh keh jin, mei akou jin, thina thei ahi. An hon pet a Mobile tham tei ding angaileh, foot 15 beh gamla a kihou pi ding ahi. Microwave a mei akilha pet akoma jong Mobile tham le lou ding, chule Petrol Pump koma jong Mobile tham lou hel ding ahi. Ithilo sanga kichih thei apha.

* Assam a Flyover gup beh sembe din vaipo ten asegi ging pan tauve. Thum hi khopi sunga Gurchuk, Lokhrah, chule Basistha a semding chule thum chu Nagaon, Bongai-gaon le Dibrugarh a ding atiuve.

* Vahui (Hornbill) kiti gam vacha hi tulai in akimu doh beh seh tapoi. Nagaland leh Kerala te din, sah umtah vacha ahi. Vahui pin atui athah ding tengleh thingko hom sung a akisel jin, apasal pan alutna ako chu asin peh jin, themcha khat abu thah lutna din ahom sah jin ahi. Ni seh in achal chun anu chu neh ding athah thah jin, lha ijat ham jouva vacha nou ho chu dalhah thei ahung hi tengle api chun thingko hom chu ama hung doh theina din akisuh hong in, ahung doh in, chu in anupa lhon in acha teu chu ahung lenthe gei in, niseh in neh ding athah thah ji lhonin ahi.

* Mipi kiti na mun, parking, dukan mai, gari station banga, koiham khat in thao namtui nadei em tia nadoh a, lekha ham, ponse ham khat chu thaonam chu ahi tia napeh le nah hih beh in, anam tui jongle hia chun chomkhat thi milna, lung vaina lou ahal un, anah ho angoi in, athimilin, hiche kah chun ama chu achom uham, ahiloule akipui manguva ajoh uham, ho tampi aumtai. Chihthei angai mama tai.

* Twi lah-a um Dolphin tia kihe gan hing (nga tobang) hin, imut leh twi a kijap akop thei-e. Ajeh chu alup pet in amit khat ahah jin ahi.

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Miss Lhingjanem Haokip, KBC
- 2) Rev. J. Manchong (Lunpu), KCC
- 3) Rev. Lhoukholal, Kangpokpi Missn
- 4) Mrs. Veikholam, Ideal school, ccpur.
- 5) Mr. Henkai Lenthang, Medziphema,
- 6) Mr. Seikholun Singsit, Kohima.
- 7) Mr. Kapcha Singsit, Dimapur.
- 8) Mr. Hegin Lhungdim, Mizoram

Het-a phachom ho

* White House a anacheng ma sapen President chu, John Adams ahin, akum hi 1800 ahi ... Suez Canal ana kiman patna kum hi, 1869 ahi ... Ethiopia min masa chu ahile Abyssinia ahi ... Mahatma Gandhi in Quit India Movement kiti anabol patna chu August 9, 1942 chu anahi ... Russia lengpa le lengnu hi amaho pauva, Tzar chule Tzarina kiti ahi.

* India dinga Bardoli Satyagraha cham lhat gal lamkai khat a anapang chu ahile, Sardar Vallabhbhai Patel ahi ... India ti louva 15 August nia Independence Day manga hi South Korea ahi.

Christian Meivah
September - October, 2019

PRINTED MATTER

To :

Editor :
Rev. M. Haokhothong,
C/o, T. Manchong
Nichols Higher Secondary School, Satribari,
P.O. Rehabori - 781008, Guwahati, Assam.

b